

# Resvegliar ei gnanc schi sempel


Aron Candrian spetga sin midadas dil cataster viticol grischun

DAD AUGUSTIN BEELI/FMR

■ Avon otg onns e miez ha Aron Candrian plantau a Sagogn ina vegna sin ina surfatscha da 400 meters quadrat. Dapi lu prosperescha il vin da Tello. Dacuort ha il viticultur raccoltau cun agid da siu bab Hannes il «Resvegl 2020». Las iuas ein dalla sorta Solaris. Igl ei ina resistente encunter malsognas e bulius. Ed aunc in motiv ha decidu che Aron Candrian ha elegiu quella sort: ella ei tumpriva e maderescha baul. Gia avon treis jamnas ha il viticultur da hobi raccoltau las iuas. Malgrad gronds sforzs, bia lavur ed era enqual obstachel ei gl'um da 42 onns cuntents cul project «Resvegl». Quei num ha el dau il 2016 al vin da Sagogn. «Resvegl» sereferescha ad ina rescuvierta. El renomau testament menziuna gl'uestg Tello siu bein principal a «Secanio» cun curtgins e vegnas. «Item curtinum cum pomiferis suis. Item ortos ed vineas subter curtem ex integro» ha gl'uestg dictau ad in da scarvons. Quei tut e biars auters beins en Surselva ha el fatg si gl'onn 765 alla claustra da Mustér. 500 onns pli tard eis ei vegniu pli criu e freid ell'Europa. E gliez ha giu consequenzas: la cultivaziun da vin en regiuns muntagnardas ei svanida ed ida en emblidanza.

## Uonn in niev record

1250 onns sunter il testament da Tello han ils da Sagogn puspei ina vegna. Il viticultur da hobi Aron Candrian, siu frar Martin ed ils geniturs Hannes e Vroni, han



Aron e Hannes Candrian avon la vegna a Survilada. «Il territori ei ideals per vin», san els ussa.

FOTO AUGUSTIN BEELI

plantau la primavera 2012 300 enfiarlas e fundau ina nova vegna silla spunda da Survilada. Treis onns pli tard ha el saviu raccoltar l'emprema gada iuas. La grafica

dall'etichetta da vin muossa ina gronda surfatscha alva ed il plaid «Resvegl» en scartira veglia. Giudem l'etichetta ves'ins ina cuntrada ondulada e sil fons – mo pign

e strusch da distinguer – dus tacs da color: il blau ei il Rein ed in verd la vegna. Igl ei l'emprema vegna spel Rein. Buca la «Goldene Sonne» ed il «Glockengiesser» da Favugn, mobein il «Resvegl» da Sagogn ei gl'emprem vin che prosperescha spel Rein. Las 300 enfiarlas che la famiglia Candrian ha plantau sin ina parcella cun bellezza vesta ella Foppa ha dau gl'emprem onn 166 butteglas vin alv. Lu eis ei iu ensi: La raccolta dils onns 2018 e 2019 ha dau mintgamai 282 butteglas. Ina particularitad ei ch'il viticultur astga buca vender allas ustrias quei vin da qualidad superiura. Il cataster viticol grischun ha definiu las zonas, quellas ein el Segneradi, el Puschlav e Mesauc, els Tschun Vitgs, Cuera e Favugn. El excluda autras regiuns adattadas sco la Foppa ed era la Tumliasca.

«Nus savessen vender il dua- e treidubel dil Resvegl», gi Aron Candrian. El deplorescha la limitaziun restrictiva dil cataster viticol. La finamira oriunda da lez ei clara: Mantener e schurmegiar la qualidad dil vin grischun. Che quel da Sagogn ei da qualidad superiura sa il producent Aron Candrian ussa. Gl'emprem, cu els hagien plantau la vegna, seigi ei stau in experiment ed el hagi buca saviu sche quel gartegi, raquenta el.

La resca semuossa denton sco success sorprendent. La tschunavla annada dalla raccolta muossa il potenzial dil terren da Sagogn. Dapi ch'el ha entschiet a distribuir – senza vender – quei product original, survegn el trasora resuns. «Enologs e gas-

tronomia intimeschan nus, da porscher quei vin», aschunta Hannes Candrian.

## Cataster viticol steric

Las troclas ch'els han raccoltau avon treis jamnas a Sagogn e menau a Fläsch ella pressa, dat in niev record. Bab e fegl quentan cun 300 butteglas «Resvegl 2020». La sort tumpriva Solaris dat puspei ina qualidad extraordinaria. Distribuir il vin ei absolutamein negin problem, denton vender ei scumandau. «Per in product aschia ei quei fetg donn», gi Aron Candrian. El declara ch'el astgi, tenor ordinaziun, producir sin ina surfatscha da quater aras pigl agen diever ni sco schenghetg original.

Aron Candrian quenta ch'il cataster viticol steric seigi vid ballucar. Era ella Tumliasca ed en singuls auters vitgs fan ins vin da qualidad sin surfatschas pintgas. Culla midada dil clima savess ei esser uras ch'ins adattescha il cataster memia stretg. Candrian spera ch'il departament da cusseglier guvernativ Marcus Caduff vegni a risguardar surfatschas per la viticultura en Surselva. La suprastanza communal da Sagogn ha integrau el maletg empalont dil territori dalla vischnaunca da Sagogn rodund 15 hectaras. Ils loghens Survilada, Valletta, Quadras e Bregl ha la vischnaunca definiu sco futura zona viticola. «Il vin sursilvan ha en scadin cass avegnir», concluda Aron Candrian. Sia visiun fussi da plantar a Sagogn buca mo Solaris, mobein era sorts sco Pinot noir e Completer. Che gliez experiment gartegiass, ei il viticultur da Sagogn perschadius.

reclama



**RENAULT**  
Passion for life

## Renault ZOE jetzt mit Fr. 10 000.– Elektrobonus.



Elektromobilität für Sie: Entdecken Sie den 100 % elektrischen ZOE. Ihr Renault Partner informiert Sie gerne über zusätzliche finanzielle Vorteile für Elektroautos an Ihrem Wohnort.

Angebot gültig für Privatkunden bei den an der Aktion beteiligten Renault Händlern in der Schweiz bei Vertragsabschluss vom 01.10.2020 bis 31.10.2020. ZOE Life R110 Z.E. 50, 0 g CO<sub>2</sub>/km (in Betrieb ohne Energieproduktion), Energieverbrauch 20,0 kWh/100 km, Energieeffizienz-Kategorie A, Katalogpreis Fr. 35 900.– (inkl. Batteriekauf), abzüglich Elektrobonus Fr. 10 000.– = Fr. 25 900.–.

